

La vita de Franz Jägerstätter

N filmat de Giampiero Girardi e Fulvio Demartin vegnarà prejentà ai studenc de la scola auta

Sozieta - Tel chèder di festejamenc di 30 egn de la biblioteca de Cianacei vegn endrezà na scomenzadiva che se ouc ai studenc de la scola auta de Fascia. Se trata de la proiezion de n filmat dal titol "Franz Jägerstätter. Un contadino contro Hitler" rencurà da Giampiero Girardi, co la regia del moenat Fulvio Demartin Pinter. Chest video conta la storia de Franz Jägerstätter, n bacan nasciù del 1907 a St. Radegund, te l'Auta Austria, a pec kilometres dal confin co la Germania. N om che pel vegnir definì desche n "resistent" al nazism, n scempie contadin che à sapù se remir al regim de Hitler. Chiamà en vera del 1943 l'ha declarà che desche cristian no l podea servir l'ideologia hitleriana e scombater na vera no giusta. La scelta de Franz vegn prum de dut da na gran fe te Die e l Vangele. Te el la coerenza doventa fator distintif, no per preconzec ideologics o per n astrat pazifism, ma percheche l se lascia vidèr da la concreta e vivuda adejion ai valores, ai significac, ai besegnes te chi che l cree. E chest con gran padiment percheche l cogn jir de contra a chel che l ge tegn de più, la familia. Franz l'era maridà con trei pìcola fies, ma tedant a la familia l'ha semper metù Die. Ence a sia femena, ti 20 menuc de dialogh conzedù te perjon a Berlin, inant che i ge tae via l cef, l ge recorda la paroles del Signoredio: "chi che ge vel al pèr o a la mèr più ché a mi, no l'é degn de me". La testimonianza de Franz se poja sun n fon sens de la degnità de la persona, sul valor de la coscienza, su l'importanza de la responsabilità individuala ence tedant a sceltes che cogn fèr duta la jent. E la recorda

ence l sacrificie de duc chi che se à batù contra la violenza di regimes totalitèr. L film é stat girà ti lesc olache Franz l'ha vivù, sot la supervijion de l'espert Giulio Briani. I atores é duc de la compagnia "San Genesio" de Volano fora che i protagonisc Bruno Vanzo e Maria Grazia Bridi (tel ruol de Franz e de sia femena Franziska) che fèsc pèrt del GAD sperimentèl Città di Trento. La Caritas diocesana de Trent e l Coordinament trentin di obietores a la speises militèr a sport n prezios contribut finanzièr. Per chel che vèrda la imagines veies, desche cheles sun Hitler, à dat na man l Zenter de documentazion ebraica contemporanea de Milan.

L filmat se sera sù co la imagines de la fossa de Franz Jägerstätter, che é stat fat beat del 2007, che se troa vejìn a la geja de St. Radegund.

Chesta proiezion vegnarà portèda dant en mèrtesc ai 24 de november te la Sorastanza de la scola de Fascia a Sèn Jan per i studenc de la scola auta co la partezipazion de Giampiero Girardi che sarà relador e moderador del debatit.



Franz Jägerstätter.